



CENTRALNA/SREDIŠNJA HARMONIZACIJSKA JEDINICA
ЦЕНТРАЛНА ХАРМОНИЗАЦИЈСКА ЈЕДИНИЦА

Broj: 03-1-16-8-18-1/26
Sarajevo, 16.01.2026. godine

Na osnovu člana 61. stav (2) Zakona o upravi („Službeni glasnik BiH“, br. 32/02, 102/09 i 72/17), čl. 33b. i 33f. stav (2) tačka b), a u vezi s članom 33i. stav (2) Zakona o finansiranju institucija Bosne i Hercegovine („Službeni glasnik BiH“, br. 61/04, 49/09, 42/12, 87/12, 32/13 i 38/22) i člana 4. stav (4) tačka c) Odluke o uspostavljanju Centralne harmonizacijske jedinice Ministarstva finansija i trezora Bosne i Hercegovine („Službeni glasnik BiH“ broj: 60/24), direktor Centralne harmonizacijske jedinice Ministarstva finansija i trezora Bosne i Hercegovine, *donosi*

**PLAN I PROGRAM OBUKE IZ OBLASTI
FINANSIJSKOG UPRAVLJANJA I KONTROLE U INSTITUCIJAMA
BOSNE I HERCEGOVINE ZA 2026. GODINU**

I OPĆI DIO

Član 1.

- (1) Predmet Plana i programa obuke iz oblasti finansijskog upravljanja i kontrole u institucijama Bosne i Hercegovine za 2026. godinu (u daljnjem tekstu: Plan i program obuke) je stručna obuka: osoba zaduženih za finansijsko upravljanje i kontrolu, koordinatora za proces upravljanja rizicima, rukovodilaca nižeg i srednjeg nivoa rukovođenja u institucijama Bosne i Hercegovine, zaposlenih u institucijama Bosne i Hercegovine koji imaju ovlaštenja i odgovornosti za učešće u provođenju postupaka javnih nabavki, zaposlenih u institucijama Bosne i Hercegovine kojima su dodijeljena ovlaštenja za pristup *PIFC* aplikaciji, uključujući i druge zaposlene kojima rukovodilac institucije dodijeli ovlaštenja i odgovornosti za uspostavljanje i razvoj finansijskog upravljanja i kontrole (u daljnjem tekstu: FUK), kao i zaposlenih u organizacionim jedinicama za finansije i budžet u institucijama Bosne i Hercegovine.
- (2) Svrha Plana i programa obuke je upoznavanje osoba navedenih u stavu (1) ovog člana sa:
 - stepenom uspostavljanja FUK-a u institucijama Bosne i Hercegovine,
 - planiranim mjerama za razvoj sistema FUK-a u institucijama Bosne i Hercegovine,
 - aktivnostima koje je potrebno izvršiti u cilju realizacije zaključaka Vijeća ministara Bosne i Hercegovine i Parlamentarne skupštine Bosne i Hercegovine u vezi s Konsolidiranim godišnjim izvještajem o sistemu finansijskog upravljanja i kontrole u institucijama Bosne i Hercegovine za 2025. godinu,

- preporukama za unapređenje i razvoj sistema FUK-a koje je Centralna harmonizacijska jedinica Ministarstva finansija i trezora BiH (u daljnjem tekstu: CHJ MFT BiH) dala u Konsolidiranom godišnjem izvještaju o sistemu finansijskog upravljanja i kontrole u institucijama Bosne i Hercegovine za 2025. godinu,
- metodologijama za provođenje aktivnosti za razvoj FUK-a koje je Centralna harmonizacijska jedinica Ministarstva finansija i trezora BiH propisala podzakonskim aktima iz oblasti FUK-a,
- mjerama i aktivnostima iz Operativnog godišnjeg akcionog plana Strategije razvoja sistema internih finansijskih kontrola u institucijama Bosne i Hercegovine za 2026. godinu i
- značajem realizacije preporuka iz revizorskih izvještaja Ureda za reviziju institucija Bosne i Hercegovine, a koje se odnose na unapređenje sistema internih kontrola u institucijama Bosne i Hercegovine.

II PROGRAM OBUKE

Član 2.

Program obuke iz oblasti finansijskog upravljanja i kontrole za 2026. godinu sastoji se od tri modula i to:

- *Modul 1:* Pojam, svrha, metodološki okvir i karakteristike kvalitetnog sistema FUK-a;
- *Modul 2:* Prezentacija Konsolidiranog godišnjeg izvještaja o sistemu finansijskog upravljanja i kontrole u institucijama Bosne i Hercegovine za 2025. godinu s preporukama za unapređenje sistema finansijskog upravljanja i kontrole u institucijama Bosne i Hercegovine;
- *Modul 3:* Instrukcije za izradu godišnjeg izvještaja o sistemu finansijskog upravljanja i kontrole u institucijama Bosne i Hercegovine za 2026. godinu putem modula za finansijsko upravljanje i kontrolu u *PIFC* aplikaciji.

Član 3.

(1) Modul 1 Plana i program obuke odnosi se na:

- Uvod u finansijsko upravljanje i kontrolu,
- Organizacijske pretpostavke i upravljačka odgovornost,
- Metodološki okvir za finansijsko upravljanje i kontrolu,
- Koraci i mjere za uspostavu i razvoj finansijskog upravljanja i kontrole,
- Proces upravljanja rizicima.

(2) Modul 2 Plana i program obuke odnosi se na:

- analizu trenutnog stanja u oblasti FUK-a u institucijama Bosne i Hercegovine uzimajući u obzir analizu godišnjih izvještaja o sistemu finansijskog upravljanja i kontrole u institucijama Bosne i Hercegovine za 2025. godinu,
- prezentaciju Konsolidiranog godišnjeg izvještaja o sistemu finansijskog upravljanja i kontrole u institucijama Bosne i Hercegovine za 2025. godinu,

- prezentaciju informacija o realizaciji Operativnog godišnjeg akcionog plana Strategije razvoja sistema internih finansijskih kontrola u institucijama Bosne i Hercegovine za 2025. godinu,
- prezentaciju preporuka CHJ MFT BiH iz Konsolidiranog godišnjeg izvještaja o sistemu finansijskog upravljanja i kontrole u institucijama Bosne i Hercegovine za 2025. godinu.

(3) Modul 3 Plana i program obuke odnosi se na:

- upoznavanje osoba iz člana 1. stav (1) ovog plana i programa obuke s formom i sadržajem pitanja u obrascu godišnjeg izvještaja o sistemu finansijskog upravljanja i kontrole za 2026. godinu,
- prezentaciju funkcionalnosti *PIFC* aplikacije u modulu za FUK „Izvještaj samoprocjene“ i
- primjenu Pravilnika o izvještavanju o sistemu FUK-a u institucijama Bosne i Hercegovine.

Član 4.

- (1) Obuka za Modul 1 trajat će 4 (četiri) školska sata i namijenjena je osobama zaduženim za finansijsko upravljanje i kontrolu, koordinatorima za proces upravljanja rizicima, i drugim službenicima koje rukovodilac institucije zaduži za uspostavljanje i razvoj finansijskog upravljanja i kontrole koji do sada nisu prisustvovali obukama iz oblasti finansijskog upravljanja i kontrole. Obuka će se realizirati kao radionica interaktivnog tipa, u drugom kvartalu 2026. godine.
- (2) Obuka za Modul 2 trajat će 2 (dva) školska sata i namijenjena je osobama zaduženim za finansijsko upravljanje i kontrolu, koordinatorima za proces upravljanja rizicima i drugim zaposlenim u institucijama Bosne i Hercegovine koje rukovodilac institucije zaduži za uspostavljanje i razvoj FUK-a. Obuka će se realizirati *online*, u drugom kvartalu 2026. godine.
- (3) Obuka za Modul 3 trajat će 2 (dva) školska sata i namijenjena je svim zaposlenim u institucijama Bosne i Hercegovine koji su zaduženi za pripremu i dostavljanje godišnjih izvještaja o sistemu finansijskog upravljanja i kontrole u institucijama Bosne i Hercegovine. Obuka će se realizirati *online*, u četvrtom kvartalu 2026. godine.

Član 5.

- (1) Na obukama je potrebno prisustvo minimalno jednog zaposlenog (polaznika obuke) iz svake institucije Bosne i Hercegovine.
- (2) Rukovodioci institucija vršit će izbor polaznika obuke iz svojih institucija u skladu s planovima stručnog usavršavanja i obučavanja zaposlenih i definiranjem ciljne grupe polaznika od strane CHJ MFT BiH.

Član 6.

- (1) Polaznici obuke blagovremeno će biti obaviješteni o terminima, mjestu i načinu održavanja obuke.
- (2) Nakon realizacije Plana i programa obuke polaznici obuke dobijaju uvjerenje o završenoj obuci.
- (3) Uvjerenje o završenoj obuci izdaje CHJ MFT BiH.

Član 7.

- (1) CHJ MFT BiH će, u skladu s članom 31. Odluke o načinu provođenja obuke državnih službenika u institucijama Bosne i Hercegovine („Službeni glasnik BiH“, broj: 15/17) dostaviti Agenciji za državnu službu BiH sve relevantne podatke u vezi s realiziranim obukama radi utvrđivanja broja kredita.
- (2) CHJ MFT BiH dostavit će polaznicima obuke informaciju Agencije za državnu službu BiH o utvrđenom broju dodijeljenih kredita za predmetnu obuku.

Član 8.

- (1) Obuke iz oblasti FUK-a vode instruktori iz CHJ MFT BiH koji su u okviru projekta Evropske unije „Jačanje upravljanja javnim finansijama“ obučeni za oblast finansijskog upravljanja i kontrole u institucijama Bosne i Hercegovine.
- (2) Izuzetno od stava (1) ovog člana, CHJ MFT BiH može angažirati eskterne instruktore koji su eksperti za specifična područja obuke.

Član 9.

Eksterni instruktori za finansijsko upravljanje i kontrolu dužni su:

- pridržavati se sadržaja obuke i preporuka CHJ MFT BiH i
- stručno, kvalitetno i profesionalno provesti obuku za koju su zaduženi.

Član 10.

- (1) Esksterni instruktori za FUK, angažirani u skladu s članom 8. stavom (2) Plana i programa obuke, imaju pravo na naknadu za svoj rad, koja se isplaćuje u skladu s odredbama Odluke o načinu provođenja obuke državnih službenika u institucijama Bosne i Hercegovine.
- (2) Izuzetno od stava (1) ovog člana, direktor CHJ MFT BiH može posebnom odlukom definirati i drugačije utvrđeni iznos naknade za angažiranje eksperata, odnosno eksternih instruktora sa specifičnim znanjima i vještinama za realizaciju obuka iz ovog plana.
- (3) CHJ MFT BiH će sa svakim angažiranim esksternim instruktorom zaključiti ugovor o djelu.
- (4) Sredstva za ove naknade osigurana su u budžetu CHJ MFT BiH za 2026. godinu.

III PRELAZNE I ZAVRŠNE ODREDBE

Član 11.

- (1) Plan i program obuke za finansijsko upravljanje i kontrolu u institucijama Bosne i Hercegovine za 2026. godinu stupa na snagu danom donošenja.
- (2) Plan i program obuke za finansijsko upravljanje i kontrolu u institucijama Bosne i Hercegovine za 2026. godinu bit će objavljen na internet stranici CHJ MFT BiH <https://chj.mft.gov.ba>, odnosno na internet stranici Ministarstva finansija i trezora BiH www.mft.gov.ba, u dijelu koji se odnosi na CHJ MFT BiH.

DIREKTOR

Njegoš Pavlović, s.r.

Dostaviti:

- internet stranica CHJ MFT BiH,
- a/a.